

宋元舊本書經眼錄

宋元舊本書經眼錄

獨山莫友芝子偲

第一卷目錄

毛詩要義

以下宋槧

儀禮鄭注

儀禮要義

禮記要義

陳氏禮書

春秋經傳集解

巾箱本

春秋經傳集解

淳熙小字本

九經直音

四書集注

張子韶孟子傳

玉篇

集古文韵

史記集解

蜀大字本

漢書

景祐本

漢書湖北鹽茶司小字本

漢書鷺州書院大字本

晉書

唐書嘉祐杭州本

唐書北宋本

唐書

資治通鑑目錄

資治通鑑綱目

名臣碑傳琬琰集

輿地廣記

東南進取輿地通鑑

西漢會要

東漢會要

鹽鐵論

文場資用分門近思錄近思後錄

西山真文忠公讀書記 米海岳畫史

白虎通

百川學海

士學規範

太平御覽

源流至論四集

揮麈前錄

續博物志

纂圖釋文重言互注老子

江文通集

韓昌黎集

古靈先生文集竝年譜

山谷外集

指南錄

文苑英華纂要

萬寶詩山

第二卷目錄

書傳輯錄纂疏

以下金元槧本

詩集傳附錄纂疏

附詩序辨說附錄纂疏

禮經會元

禮記纂言

春秋括例始末左傳直解

春秋胡傳纂疏

說文解字補義

元禮部韻略

史記集解附索隱

漢書

三國志

宋史

至正浙江行中書省官本

資治通鑑

興文器著本

資治通鑑綱目

續宋編年資治通鑑

金陵新志

監本音注文中子

圖解校正地理新書

金槧本

書法鈎元

考古圖

困學紀聞

事文類聚

玉海

列子張注

宛陵文集

東萊呂太史文集竝外集

劉靜修先生文集

道園學古錄

伯生詩續編

樂府詩集

周易集解以下明
槧本

周易本義

書經纂言

書傳集解

禮記集說

埤雅

漢書

前後漢書

管子無注本

農書

野客叢書

西溪叢話

章蘇州集

韓文攷異音釋竝外集遺
文附錄

雲臺編

崇古文訣

卷第三目錄

易學

以下舊鈔本

周易觀象補義略

爾雅新義

龍龕手鑑

吉金古文釋

通鑑紀本末補後編

建康寶錄

靜齋至正直記

元和郡縣圖志

元豐九域志

新定元和九域志

長春真人西遊記

天下郡國利病書

南宋館閣錄

元祕書志

太常因革禮

政和五豐精義注

鄭堂讀書日記

舊館壇碑攷

太白陰經

素問六氣二珠密語

宋寶四年會天曆

乾象通鑑

古今集論字學新書

識遺

東坡先生物類相感志

醉翁談錄

朝野僉載

席上輔談

桂苑筆耕集

鉅鹿東觀集

河南先生文集

蘇學士文集

淳南遺老集

滋溪文稿

梧溪集

極玄集

金石三例

增錄卷第一

書衣筆識

增錄卷第二

金石筆識

右宋金元明槧本暨舊鈔本稿本書凡百三十種
悉同治乙丑迄己巳數歲中先君客游所見者或
解題或攷其槧鈔善劣或僅記每葉行字數目或
竝錄其序跋及經藏家跋語印記皆經眼時隨筆
志之以備循覽今年春姑夫黎萼齋先生自吳門

來金陵謂足備目錄家之一亟欲壽梓繩孫謹次
爲三卷更集他書衣及碑帖題語爲二卷附焉吾
家影山草堂僻在黔南舊藏粗備尤多先人手澤
遭亂後散佚略盡不可復得今卷中廝存一二先
君少時所校也念之泣然同治癸酉七月丁未朔
第二男繩孫謹志于江甯旅舍

目録終

宋元舊本書經眼錄卷第一

獨山莫友芝子偲

毛詩要義二十卷

宋本

魏了翁撰首爲譜序一卷經依箋編二十卷中又分子卷十有七凡三十八卷每葉十八行行十八字每卷各以一二三條爲題目低一格書亦有一條而有二題目者其第二題目標之眉上又有當條所掇未盡之義亦於眉上書之每卷首有棟亭曹氏藏書長白敷槎氏董齋昌齡圖書印二印卷尾有桐鄉沈炳垣手讀書記一印譜序卷首又有永超氏一印卷一

下之首有吳可驥印一印

宋魏崔山先生於理宗嘉熙元年丁酉以權工部侍郎忤時相謫靖州取九經注疏刪繁去蕪爲要義百六十三卷宋史藝文志分載其書當時陳晁兩家著錄可稱浩博亦不及載則知此書已不可多見矣四庫全書只載周易儀禮尚是全帙尚書春秋皆非完本近揚州阮氏復得尚書三卷卽四庫所闕之卷又禮記三十一卷首闕曲禮上下兩卷其餘四經竟無從咨訪矣壬辰仲春遂江督不惜重值購得宋槧毛詩要義首尾完整觸手如新爲曹棟亭舊藏

本首列目錄次譜序次詩要義二十卷其一二五六
十二至十七等卷分上下子目四卷及十八十九卷
分上中下子目其餘均作一卷總子目并序計三十
八卷展讀之下古香可劑真希世之秘笈也其體裁
與周易等相同有與疏本連文而要義取一二則者
列其次目於眉上不復分裂原文隸標目之尤爲簡
當傳箋遺辭博奧孔氏因劉炫等書爲正義於地理
名物靡不旁搜曲引以資攷核故其疏較他經爲密
鶴山復擷其要領以經及傳箋爲綱以正義爲目有
條不紊易於記誦洵治經者不可少之書鶴山所輯

尚是當時善本必與今通行之本大有不同異日再
 為細校一過始無遺憾郡城金氏藏有宋槧禮記首
 兩卷即阮氏所缺之帙當訪求之從此易書詩二禮
 五經皆成完書真大快事也遂江席豐履厚而不以
 他好縈心惟古人祕笈搜訪不遺餘力是可尚已今
 擬將付梨棗公諸同好使數百年古籍晦而復顯其
 有功於藝林豈淺鮮哉因為識此錢天樹

張文虎
 案天樹號

夢廬平湖人跋中所稱遂
 江壻者胡氏亦平湖人

魏崔山先生毛詩要義三十八卷為 文淵閣著錄

所未及道光間儀徵相國采進遺書亦未之見上海

郁泰峰氏乃蒐獲曹棟亭舊弄宋槧本于嘉興士家
海內更無第二本遂卓爲宜稼堂數十宋槧之冠友
芝同治乙丑五月來滬上珍重假讀心神開曠百慮
盡消斷推此游第一快事友芝夙有詳校毛詩疏于
乾嘉諸老所舉中外舊本異同一一甄錄唯未及要
義本他日再爲滬游必挾以來更乞與細讎一通乃
不虛此眼福也獨山莫友芝

儀禮鄭注十七卷

宋淳熙本

每葉十六行行十七字注雙行行字同板上端右
并有淳熙四年刊五篆字每卷末悉分記經注字數

一卷首十七卷尾竝有松雪齋趙孟頫印海上醉六
經齋藏書之章三印首又有竹泉珍祕圖籍啟淳珍
藏顧氏二印末又有梁氏家藏一印二卷末又有諉
聞齋主人楷書木記凡百有七字同治甲子署蘇松
太道丁禹生日昌獲之上海肆中乙丑五月三日客
道署借讀審定爲實事求是齋經籍之冠

儀禮要義五十卷

宋本

行款與毛詩同亦郁氏宜稼堂藏闕首六卷自卷之
七士相見禮始每冊首有汪士鐘印閩源真賞二印
其首六卷則鈔補

禮記要義三十一卷

宋本

行款與儀禮同亦郁氏宜稼堂藏闕首二卷儀徵相國進此書亦闕曲禮上下兩卷也卷首有新安汪氏啟淑信印二印

陳氏禮書一百五十卷

宋本

宋陳祥道撰首載建中靖國元年正月禮部差楷書畫工人鈔祥道禮書牒竝及陳暘樂書次祥道進書表序中參有樂書序一葉無前半蓋當時二書竝刻也肆中有樂書與此相似半葉十三行行二十一字

春秋經傳集解三十卷

宋巾箱本

每半葉十一行行大二十字小二十一字每卷書題
云京本點校重言重意春秋經傳集解某公某第某
亦有一二處題于重意下多互註二字者核卷中當
句下標記有重言重意互注似句四件不能盡見書
題也經傳竝句讀發四聲而不及註註下附陸氏音
義核字體似南宋元初刻舊藏者鈐以趙宋本印亦
無確據勘紙有徵明小印丁卯十月至滬肆賈以相
視驗卷端印知經藏汪士鐘徐渭仁家印本尚是中
上惜僅後半部耳有徐紫珊印汪厚齋藏書汪士鐘
讀書子有父四印

春秋經傳集解三十卷

宋淳熙小字本

每半葉十行行大十八字小二十二字板心高今營
造尺五寸弱第三十卷後有楷書八行木記云僅依
監本寫作大字附以釋文三復校正刊行如履通衢
了亾窒礙處誠可嘉矣兼列圖表于卷首迹夫唐虞
三代之本末源流雖千歲之久豁然如一日矣其明
經之指南歟以是衍傳願垂清鑒淳熙柔兆浣灘中
夏初吉閩山阮仲猷種德堂刊蓋閩阮氏種德堂書
肆所刊較巾箱本縱橫稍闊寸許其謂依監本寫作
大字知臨安舊有巾箱監本因而小拓之也戊辰春

抄蘇肆持售首有瑞南朱文印

九經直音十五卷

宋本

宋廬陵孫奕撰海甯查氏藏本九經者孝經論語孟子毛詩尚書周易禮記周禮春秋也不用反切直取同音字旁注其下無同音字則以同四聲字紐之如唐人九經字樣之例半葉十三行行二十二三字不
等巾箱本大小如今秦氏覆宋九經此音蓋卽刊附九經後者也今四庫收奕著述有示兒編提要謂其字季昭號履齋甯宗時嘗官侍從其歷官無攷四庫又收明州本宋人排字九經直音二卷爲元至元

丁亥書隱堂刊者按之即是奕書提要謂所音皆據
經典釋文而兼宋宋儒于釋文一字數音者皆竝存
之亦時有半從半違之失而大致能決擇是非陸無
音者亦頗有補苴其于宋儒詩中庸語孟用朱子易
兼用程朱他及胡瑗司馬光禮多守方慤注亦兼存
鄭義又條舉其音字若干事爲糾論踰千言又謂九
經前後失次證以奕書無不悉合紀陸諸公未見此
本遂謂纂人無攷乃今得之真大快事其卷數懸殊
者此十五卷本百一葉若爲二卷卷亦止五十葉未
爲甚大坊間合併且逸其名非宋刻僅存亦烏從識

之哉同治己巳二月查生

燕緒

持來視其師張廉卿

廉卿寓余許因更畱觀數日爲考論歸之孫氏示兒
編中有經說五卷字說五卷于字音字訓辯別異同
多資考證蓋南宋績學之士故此直音一書在宋人
經音中最爲善本纂刊無序例年月其序示兒編在
開禧元年則大率甯宗時也既望戊午

四書集註

宋本

每半葉七行行十五字經注皆有句讀註及序有口
抹其文字異今本處與元和吳氏所言宋本大同蓋
卽其所據也序後及每卷末皆附音攷於名物制度

亦有補益不知何人所爲音攷字形稍狹而活蓋本
書係用舊本翻雕所附音攷則當在用以取士時稱
淳熙本則未確項氏舊藏後歸蔣氏今歸錢塘丁氏
卷中有萬卷堂印項氏少谿主人子信管周家藏瀟
城蔣懷堂珍藏袁又愷藏書吳越錢氏鑑藏書畫齋
青拳石山房項氏世家八印

蔣氏跋云曾王父諱升瀛號步蟾一字懷堂又號采
若南宋希魯公之二十世孫世居吳淞之鄧巷邨公
自幼勵志讀書性冲粹好施與早歲有聲黌序旋貢
成均栽培弟姪輩成立者頗衆日以書史自娛當代

名公咸樂與交後遷入城蕭家巷辟鏡古齋藏書多
宋槧本郡守鼇石蘇公重刊魏公譚訓稱壽松堂蔣
氏宋本校刊者即公所藏也淳熙四書江南相傳僅
二部一藏藝芸書舍汪氏一卽此部惜逸公孫丑二
卷余嘗以爲憾因遍訪收藏家於咸豐己未借虞山
瞿氏本影鈔得成完璧瞿本蓋卽汪氏所藏者此書
在余家傳至余兒芥青凡五世敬謹什襲不敢忘先
人遺意庚申之變轉展遷徙家之所有蕩焉泯焉唯
祖遺書籍命芥兒好爲護持所在輒隨因得免於浩
劫是芥兒實有功於是書今余幸還故土而芥兒遽

化覩物觸情能毋於邑且余未有嗣則此書將來又誰爲之護持耶噫余雖以不克承先貽後爲憾而物無常主但得珍藏家金匱玉函守之弗失余亦可無負于此書也已丙寅仲夏下浣培澤敬識

張子韶孟子傳二十九卷

宋本

宋張九成撰八冊每冊有汪士鐘閬源印則其舊藏也每卷書題云張狀元孟子傳卷第幾結銜云皇朝太師崇國文忠公鹽官張九成子韶爲理宗寶慶初所贈謚則寶慶以後刊也半葉十四行行二十五字每葉左端線外皆有篇名標記末缺盡心上下二篇

四庫總目此書亦二十九卷亦謂原本佚此二篇豈
 庫本即從此出耶丁卯初冬寓蘇城有持售者俞蔭
 甫山長遣以相示薄絲紙印尚無一筆漫闕惜上下
 端朽補目天祿琳瑯載九成此書影宋鈔本亦二
 十九卷蓋即從此本出史志張氏孟子傳三十六卷
 趙希弁讀書附志亦云三十六卷則所缺者七卷也
 大廣益會玉篇 宋本

此本校今張曹兩刊多偏旁篆書八葉蓋南宋書肆
 所意增其用心良善唯部目本以領所從諸字而一
 王乃用弋玉者不少則何以訓乎錄如左

玉篇總目偏旁篆書之法

自書契造於伏羲而文

字之端始見鳥□□□□□□□□文字之形始立其後

也曰大篆曰小篆□□□□□□□□皆倣古法而爲之

變易者也世之知書者皆□□□□□□謂字學者矣然

所曉者訓讀楷書而□□□□□□□□徒見其句畫

之委蛇而不知字之偏旁有定□□□□□□偏旁有定

體則觸類而長辨章析記若繡工之觀畫目豈特施

於文字哉此予於玉篇總目五百四十二字必引篆

書偏旁以冠之也博雅君子幸毋□□□□□□

一弋上上示示二二三三王王玉玉珏珏土土垚垚

凡七葉餘四行二字以盡五百四十二部末綴楷書
一行云右字之音切已具總目此不重載

集古文韻第三卷

宋紹興本

每葉十六行行大字九約可容小字十八蓋夏英公
古文四聲韻五卷之一紹興乙丑年僧寶達刻于齊
安而開禧元年後印本黃伯思東觀餘論云政和六
年冬以夏鄭公集古韻及宗室克繼所廣本二書參
寫竝益以三代鐘鼎彝器款識及周鼓秦碑古文印
章碑首并諸字書有合古者益之以備遺忘云云是
宋人古文篆韻有三今唯英公集者有新安汪啟淑

刊本趙黃二本則皆無傳宋史經籍志及玉海謂宗
室趙善繼與于汴京石經之役者嘗進古文篆韻一
書當與伯思所指克繼爲一人或一字誤記也知此
本爲紹興刻開禧印者全祖望古文韻題詞謂曾借鈔天
一閣夏英公古篆韻據晉陵許端夫序蓋紹興乙丑
浮屠寶達重刻于齊安郡學許爲郡守因序之寶達
者劉景文之孫精于古文篆親爲摹寫其亦南嶽夢
英一流矣至北宋本當有前序而今失之按此本僅
上聲一卷其有許序及有前序否不可知而紙背大
半是開禧元年黃州諸官致黃州教授書狀宋黃州

猶稱齊安郡此板在郡學學官以書狀紙背印書事
理之常故知爲紹興刻開禧印也紙背狀中首尾結
銜一曰朝散郎權知黃州軍州事王可大一曰秉義
郎新添差黃州兵馬監押趙善覲一曰訓武郎黃州
兵馬都監兼在城巡檢徐靄一曰迪功郎黃岡縣尉
巡捉私茶鹽礬銅錢私鑄鐵錢兼催綱陸工程一曰
朝奉郎行戶部員外郎吳獵一曰武畧郎添差淮南
西路將領張□一曰學諭章準一曰學生教諭李起
北一曰學生直學徐灝一曰升大失其官及姓凡十
人其本官結銜則云從事郎黃州州學教授呂吾衍

學古編云夏竦古文四聲韻五卷前有序并全銜者
好別有僧翻本不可用此書板多而好者極不易得
所謂僧翻本蓋卽此本全氏謂其精于摹寫而吾氏
謂不可用以今行汪刊本校之小有損益異同而夏
氏所用二百十部切韻其部次與唐顏氏千祿字書
合者乃移改同廣韻集韻則斥其不可用者誠非苛
論也徒以宋刻宋印且紙背諸狀足見爾時交際儀
式故取備一種耳是書紹興乙丑刊開禧乙丑印而
余後十一乙丑同治四年之夏收諸上海市中抑何
巧合乃爾物之顯晦豈亦有數耶

古人文移案牘用紙皆精好事後尙可他用蘇子美
監進奏院以鬻故紙公錢祀神宴客得罪可見宋世
故紙未嘗輕弃今官文書紙率輕薄不耐久

史記集解

宋蜀刻大字本

上海郁氏藏

玄敬躬貞徵讓獅字栢竟缺慎不缺每葉十八行行
十六字注行二十一二十二字不等初印紙墨精絜
本紀存五六八九十一十二七卷表存四五兩卷
世家存五至十及十八至二十四及二十六十四卷
傳三十九四十及四十七至五十僅六卷共二十九
卷每卷有當湖小重山館胡氏遂江珍藏紀九卷又

有吳寬白小地山子孫保之四印十一又有停云鑿
錫余以嘉名芙初女史姚晚真印勤襄公五女若衡
五印

漢書一百卷

宋景祐本

影鈔補者目錄帝紀一上下表七上下傳三十二至
三十四上數卷其實爲景祐原刊合得七十餘卷餘
者以元人覆本補之其中元統大德修補之葉黃堯
圃悉記其目于卷端鈔補數卷則本自曹倦圃堯圃
有此書爲倪雲林凝香閣舊藏者見百宋一廬賦注
後歸汪閻源此其次也卷中有眉公鬚儒曹溶鑒藏

虞山張蓉鏡鑒定宋刻善本姚氏婉貞笑初女史諸
印首有李申耆識云漢書宋景祐刊本烜赫於絳雲
樓六丁取之矣西清古鑑所收亦景祐本 天府之
儲無由見也向時張月霄藏有元統大德補修本欲
借未果而已星散深以歎惋此本亦有補刊未知與
月霄本何似然原刻存者尙十七八以校別本甚有
差殊擬仿盧抱經先生羣書拾補之例爲校勘記以
永其傳僅盡首函思借全書足成之芙川諾我否道
光十七年徂暑之月揮汗識此武進李兆洛後歸張
氏郁氏今歸豐順丁氏

漢書一百卷

宋湖北提舉茶鹽司小字本

半葉十四行二十七字或二十六二十八二十九字
不等注行三十四字或三十三三十五字不等板高
今七寸弱其避諱至慎字止蓋孝宗時刊遂初堂書
自有湖北本前漢書當即此本以校明汪文盛本時
有互勝互脫字而足正汪誤者多汪本自八表下每
附劉氏說而此本皆不附同治己巳秋吳門市出汪
士鐘舊藏又有陳道復印則僞作也

漢書

宋鷺洲書院大字殘本

半葉八行行正文十六字注文雙行二十一字每卷

未皆記一行云右將監本杭本越本及三劉宋祁諸本參校其有同異竝附於古注之下又有正文若干字注文若干字一行或二行在卷題後始刊于南宋末畢工于元至正間其卷末記甲子可考字較景祐本尤爽目惜僅景十三王傳司馬相如兩卷鷺洲乃吉安府城東贛江中長數里之白鷺洲宋淳祐間知吉州江萬里建書院其上以教俊秀歐陽守道爲之記徐俯師川詩云金陵與廬陵俱有白鷺洲相望萬里江中同二水流者是也已巳七月七日觀于沈均初

樹

鋪舍人案頭雖殘帙亦可貴

海甯吳免牀騫有宋刊漢書殘本列傳十四卷葉十六行行十六字

張金吾有宋嘉定刊後漢書葉十六行行十六字注二十一字百宋一廛賦注云嘉定戊辰蔡琪純父所刊也

晉書

宋本

每半葉十四行行二十五字明王弼洲舊藏今歸錢塘丁氏每卷首尾晉書若干在紀志傳載記若干之下者皆刊補寫殊不可解卷首有鼎元臣筠三晉提荆仲雅商邱宋舉收藏善本馬瀛之印二檀漢晉齋

印八印尾有泰峯見過一印

此書爲王弼洲先生所藏貞元本唐德宗年號印恰符先生名字故其祕冊往往摹而用之下必繼以三雅印此屬仲雅者嚮曾遭割裂想經先生改正余全史中原本亦係宋刻每多缺字而此本特全洵可寶也

也湖南毛晉識

唐書

宋嘉祐杭州本

每葉二十行行十九字其末卷二十二葉後八行總計云唐書凡二百二十六篇總二百五十卷 二十一帝紀一十篇一十卷 十三志五十篇五十六卷

三表十五篇二十二卷 列傳一百五十篇一百

六十卷 嘉祐五年六月二十四日 進呈 二十

三葉載銜名編修官劉義交行一呂夏卿行一宋敏求行一

王疇行二范鎮行三刊修宋祁行三歐陽修行三提舉編修曾

公亮行二嘉祐五年六月二十六日准中書劄子奉行一

聖旨下杭州鏤版頒行行一校對無爲軍判官將仕郎

試祕書省校書郎充國子監直講行一其三十四葉缺

校對銜名未完 同治乙丑五月嘉興馬氏持售于

上海僅尾三卷逆臣傳以湊別一舊本謂別本爲宋

刻此三卷爲元刻以余審之此三卷宋刻其別本之

全乃元明間刻耳別本板心校此高廣各一指許每
葉二十行行二十二字每卷題名但云歐陽修奉勅
撰宋祁奉勅撰而不具官銜不書臣此三卷則銜臣
皆具且字體方滿精神故也別本末附釋音二十五
卷今官本亦有之其序一篇不記載否漫錄如左
新唐書釋音序 將仕郎前權書學博士臣董衝上
進嘉祐中 仁宗 皇帝詔儒臣修唐書其事廣於
前其文粹於舊學者願觀焉或字奇而莫能辨則悵
然而中止者有矣猶之求珠於九重之淵驅龍寤而
當其前則退縮而不敢進彼雖至寶橫棄於其側可

得而有之耶故諸史中惟新唐書能究其終始者尤
鮮臣每讀晉史見何超纂音義竊嘗慕焉於是歷考
聲韻以爲之音使學者從容而無疑觀其文章藻繪
體氣渾厚可以吹波助瀾揚厲清浮則愈於得寶之
美也若夫名篇之目立傳之實增損出入有異於舊
史者悉見諸因革云崇寧五年十一月日臣衝謹序

釋音中第一卷有結銜
竝同上二卷以下俱無

唐書

北宋本

每半葉十四行行二十五字其爲原刻者半修換者
半蘇門市中物有汪士鐘印

唐書 宋本

每半葉十六行行二十九字汪閬源氏舊藏今歸錢塘丁氏每冊首有汪士鐘印閬源真賞二印

資治通鑑目錄三十卷 宋本

陳本于自序後更出結銜開卷卽知其謬又每年歲陽歲名之末復以甲子乙丑注之亦疑其不然此本自序後卽接書年國卷每年下亦不注甲子乙丑且結銜一行密字敕乃提行可見溫公元式上海郁氏宜稼堂藏此以爲宋本驗第一卷結銜字多差誤蓋翻雕者偶爾失校其爲宋爲元皆不可知然足以洗

明人移刻之陋亦劇可寶貴矣此本第一卷三十八
葉第二卷四十六葉陳本鬆展之一卷五十八葉二
卷六十五葉亦多費紙墨絕無勝處此本凡書一事
下空一格陳本于空格皆填一圈然誤聯二事爲一
者不少且多增減錯誤竝當以此本正之湘鄉相國
嘗以胡果泉仿刻元本通鑑無目錄爲闕典思得善
本刊傳以惠學者此足以稱之矣當爲一言借影付
雕也每卷首有宋本曾在春星閣汪士鐘曾讀三印
竟不知來自誰氏

資治通鑑綱目五十九卷

宋乾道本

乾道壬辰四月刊縣紙精印首尾一律每半葉八行
行十七字雙行亦行十七字有弘治初人題識謂在
當時已難得如此善本季蒼葦舊藏有名字印後爲
郁泰峯宜稼堂所收今歸豐順丁禹生氏

新刊名臣碑傳琬琰集一百七卷

宋本

半葉十五行行二十五字

輿地廣記

宋本殘帙

始第十八卷至末三十八卷止每半葉十行行二十
字卽黃丕烈士禮居仿刊祖本首有丕烈題識同治
乙丑夏滬上市出此書前二冊亦宋槧式相似亦丕

烈據以仿刊者惜未能收合之也豐順丁禹生方伯
所藏丁卯仲冬借觀記

東南進取輿地通鑑三十卷

宋本

宋孝節先生趙善譽撰取三國至梁陳東南攻守事
事爲之圖圖後附以地理攷及本事始末蓋爲南渡
後圖金而作是當日極有用書也 文淵閣未及著
錄蓋逸已久矣每葉二十六行行十九字上海郁氏
宜稼堂所藏卷首有太華山人汪士鐘印三十五峯
園主人从龍私印劒光閣黃丕烈印藝圃東吳宋克
冒鸞九印而百宋一塵賦不之及

自序云善譽聞險要視平地攻與守屬諸人古今之地未始殊絕而或得或失者人事之不侔也自三國以迄于陳南北攻守之變備矣其事可覽而類也其地不可不攷而圖也覽古之事以攷今之地口爲有用之學哉難之者曰古尋陽本治江北而今在江南自溫嶠始徙也古當塗本以塗山爲邑而今在姑孰晉成帝遷之也是郡邑之不常未易以今究也古駱谷道自盩厔南通漢中今塞矣唐武德間所開非必漢魏之舊也古巢河水北流合于肥河今堙矣吳魏舟師之所由不可見也是川陸之不常未易以今

論也若此之類不勝殫舉則此書欲以有用無乃幾于無用也吁杜征南預以晉之郡國而釋春秋之地名顏祕監師古以唐之州縣而注漢秦之疆域其曰未詳者不害爲闕疑而二書遂瞭然于千載而以古今之難窮爲諉而不盡其心哉故因通鑑編年參之正史以類南北之武事即地理之書攷之今日以究攻守之所在旣載其事以論之又爲圖于前以便稽覽雖曰昔人遺跡不無湮滅而古今地志亦或疏畧然尋文□圖可攷者十常八九其所未究則闕之以俟博□於史學不爲無補也唐太宗有言曰以古爲

鑒可知輿替而光武系隆炎漢廓清六合實有感于披輿地圖之日則是書之有用將不止爲觀史之助焉趙善譽謹序

黃蕘圃庚午夏跋謂此爲無錫故家物主人姓顧係涇陽先生八世孫此書尙是涇陽先生從都中寄歸者又跋云東南進取輿地通鑑自來藏書家惟傳是樓著錄然止云二十卷一本亦不詳刻鈔字樣則徐氏之書非卽是本矣此書名目在宋已非一定檢宋史藝文志史鈔類云趙善譽讀史輿地攷六十三卷一名輿地通鑑陳氏書錄解題云南北攻守類攷監奏進院趙善

譽撰進以三國六朝攻守之變亦作三十六卷茲所
鑒古事以攷今地每事爲之圖
存者殆一半差弱序全目佚三十卷後割補之痕宛
然三國六朝之總圖總論具存其每事爲一圖至晉
而止書之殘毀僅存者正賴此宋刻祖本豈非天壤
間奇物乎復翁記

西漢會要七十卷

宋本

宋嘉定乙亥刊本進書半葉十一行行二十字序題
從事郎前撫州州學教授臣徐天麟上進目錄及每
卷題銜皆同進表末署嘉定四年九月十一日

漢高帝卽位之明年尊太公爲太上皇越四年令郡

國立太上皇廟終漢之世止稱太上皇高帝有天下而祖廟不立博士諸生無能言者其他庶事艸創何足怪也司馬遷作史記具載帝王世系至高帝紀言太公而不言其名言劉媪而不言其氏班固從而因之劉氏世系無傳焉固實爲漢史而大事率略如此漢家制度豈能廣記備言耶徐君仲祥甲科名士采漢故事彙聚成書目曰西漢會要漢禮樂庶事大略可睹視遷固二史有功多矣余少不揆嘗論次漢事補漢百官兵制及續食貨志藏之篋笥不知何人持去至今往來于心也仲祥更因是書稍加潤色成一

家言庶幾漢事得失有所是正二書竝行益善矣仲
祥旣上其書于朝大參樓公爲之序屬余書其後顧
余何敢而仲祥請益勤姑以平生所懷附諸卷末云
嘉定四年嘉平月永嘉戴溪書

訖聞西漢會要久矣茲辱奏院公貽書以其介弟總
幹所傳錄經進別本俾刊于郡齋訖固所願見所願
傳者因得孰復其間舉宏撮要互見旁引可謂用心
勞苦一開卷則漢二百年規模制度森然在目自非
專門問學相承好古博雅源深流遠實事求是眞積
力久安能臻此然書史傳錄之或誤則鐫工摹刊之

必差一字失其本畫一語脫其全文則未免有害于義理于是訪求正史之善本校對之果有如前之差誤者既加是正而後命之鋟梓庶不孤所辱昔班氏父子采前史遺事旁貫異文續太初以後之書其文澹而事詳世稱爲良史本朝公是公非二先生是正西漢所謂三劉漢書與所著東漢刊誤漢官儀竝傳于世今奏院公父子叔姪兄弟一門儒業之盛先是有漢官考鋟行廣右其視二班三劉一家之學可謂有功於漢史俱深矣今本既盡善學者能考一代之制從而追復先秦而上三代之文則是書之傳豈曰

小補之哉嘉定乙亥春鉅野李訖書

樓大防序失去首又有錄白省劄云祕書省狀嘉定四年十一月十六日準都省送下從事郎前撫州州學教授徐天麟劄子竊惟三代而下言治者必曰漢唐七制三宗之治固已炳煥青史至於典章法度散在紀傳學者每病本末難見自國初儒臣編類唐會要獻之藝祖皇帝而唐之制度紀綱粲然易考惟是漢接商周而興一代彝章號爲近古而獨未有類書頗爲缺典天麟不量譾薄編成西漢會要七十卷目錄二卷已於九月十一日具表投進二部共八十冊

內一部乞降付太子宮一部乞降付尚書省今已兩
月未蒙付出重念天麟辛勤鑿窻垂三十年凋疲心
志僅成此書西都文物頗爲詳備上可以廣聖學之
緝熙下可以備禮官之考訂其於治道不爲無補天
麟所進正本見蒙畱中今別寫到一部計一十冊見
在欲望朝廷取索今來寫到一本送秘書省詳看施
行庶幾天麟半世編摩之工不爲徒勞後批送祕書
看詳申尚書省又於十二月二十二日準都省送下
徐天麟上表繳進西漢會要四十冊乞降付史館事
後批送祕書省一就看詳申尚書省本省照得所進

文字止是一書今看詳到徐大麟所進西漢會要勤
於史學總輯有功伏乞朝廷指揮施行本省元承都
省批下徐天麟二狀繳連在前竝發下西漢會要二
部隨狀繳納見到伏乞照會施行申聞事仍連西漢
會要進本竝副本二部共五十冊正月二十八日奉
聖旨降付祕書省 右劄付祕書省嘉定五年二月

三白押

押押

東漢會要四十卷

宋本

宋寶慶丙戌刊本進序署寶慶二年六月二十二日
奉議郎武學博士臣徐天麟謹上表末署同目錄及

每卷結銜同亦十一行行二十字二書皆上海市出
西漢紙黃色稍短襯接成大冊東漢則白縣紙甚高
闊二書皆歸武原馬玉堂笏齋明經乃合裝之有道
光壬辰識語今爲應敏齋方伯所購東漢會要 四
庫據傳鈔宋本缺三十七三十八兩卷又三十六三
十九兩卷各佚其半此本此四卷皆全洵奇寶也
唐治不過兩漢唐有會要漢乃闕而未備武學博士
徐君仲翔彙集兩漢事各爲會要一書會要有書則
兩都之制度典章散在紀傳表志間者皆易於參攷
旣於治道不爲無補加惠後學亦非鮮淺前郡侯已

刊西漢會要于郡齋踰十年東漢事會粹始就仲祥父
子伯仲俱刻意史學各有書行於世仲祥此書尤有
益於世用其用志亦篤矣併鋟木以廣其傳寶慶丙
戌良月朔古括葉時書

鹽鐵論十卷

宋本

漢桓寬撰每半葉九行行十八字第十卷末葉有淳
熙改元錦谿張監稅宅善本二行楷書木記紙墨亦
精雅卷首有馮武題識云先太史藏書萬卷子孫不
能讀且不知愛惜卽宋元精板嘉書盡化爲蝴蝶飛
去吾能無念乎茲鹽鐵論十卷相傳宋板末有淳熙

改元錦谿張監稅宅善本等字余素愛寶之不敢批
 點又得副本遂以此贈平原文虎道兄因文虎文墨
 筆硯之好與吾同病在環堵中無異於別館也時己
 巳年暮春河漢馮武謹識乙丑春上海市出豐順丁
 禹生觀察所收暇當取家藏明本一校馮武乃定遠
 之從子傳其

筆法著有書法正
 傳十卷見簡明目

文場資用分門近思錄二十卷近思後錄十四卷宋本

海甯查氏藏本蓋南宋末坊刊朱子序後有建安曾
 氏刊於家塾二行木記以朱子書分為百二十一目
 破析瑣碎直不成書間元周公恕有此書分類集解

頗妄爲分析移置大概與此書相似觀其書題可知
其不學矣其後錄皆采朱子所錄之外程門諸儒以
下及于朱子之說分道體論學致知存養克己家道
出處治道制度事理教人謹戒異端氣象十四目各
爲一卷較前書爲有條理不知何人編也唯其刊印
精雅卽坊刻乃勝明隆萬以還江河日下有卽梓匠
一端可以觀者已巳二月識

西山眞文忠公讀書記

宋本

每半葉九行行大十六字雙行小字二十四寫刻精
好不苟宋本之善者惜僅有甲記三十七卷卷端有

季振宜讀書季振宜印滄葦數印

米海岳畫史一卷 宋本

豐順丁氏藏每半葉十一行行二十字卷末有朱筆

書康熙癸巳蔣生子範所贈一行前有咸豐四年顧

武保題識謂是冊宋槧初印購貞躬徵等字避諱首

葉有葉氏藏書印蓋卽文莊故物末朱字一行何義

門手筆 子範蔣棟字長洲人何太史弟子

白虎通上下二卷 宋本 嘉興唐氏藏

有乾隆甲辰盧文弨跋云余校白虎通付校垂竣而

吳子葵里示余以此本此北宋時坊間所行未校本

也其小序數行云白虎建德論者開卷卽已錯譌余
取其書字字比對始知此本尙多古字而近世本率
多改易至性情篇中有與近本迥異而實勝者卽一
二誤書尙可循形聲而得其本字若近世本則不加
思索而徑改矣雖分上下兩卷然篇目上作圓圍者
十仍不失十卷之舊近世本最後三篇此本在爵號
謚之次實第二卷也三篇之序亦復不同後得元大
德本與明傅氏程氏吳氏何氏本不甚異要皆不及
此本余取此書之善者具著于校勘補遺中仍以其
本歸吳子十二行行二十三字鷓安云此宋刻元印

坊本故多譌字不避諱字畫乏遒勁之氣已開元初風氣必推為北宋本陋矣

百川學海

宋本 上海瞿氏

宋左圭禹錫編刻之百種每半葉十四行行二十八字

皇朝仕學規範四十卷

宋高熙三年本

每葉二十四行行二十五字句讀有小圈竝圈發異讀字之四隅其葉數通八卷為一起蓋是元分五冊裝紙墨精絜可愛張功甫自序刻此書在淳熙丙申四月蓋即張氏自刻初印本也嘉道時藏嘉興張亦

未廷濟家自二十三至末缺八卷及自序卷目竝未
未鈔補同治乙丑五月客上海醉墨書肆持售畱觀
五日其卷九卷十七卷二十五首竝有張廷濟印張
未未尙寶少卿袁氏忠徹印三印及袁氏靜思齋引
顏氏家訓六十五楷字長木記卷八卷十六卷二十
四卷三十二尾竝有楊廉夫清儀閣張未未廷濟四
印未未題其首曰淳熙三年丙申原刻初印係楊鐵
崖袁忠徹舊藏本乾隆時武陟令查宣門開所珍貯
者嘉慶時余從宣翁之子棗庵秀才以銀十餅購得
前缺序目後缺作文作詩二類八卷余從海鹽朱春

黃丕烈印復翁士禮居藏南州高士東海豪家六印
題銜惟首卷云翰林學士承旨正奉大夫守工部尚
書知制誥上柱國隴西縣開國伯食邑七百戶賜紫
金魚袋臣李昉等奉

四十二字
字一行勅纂二字
餘卷無

源流至論四集四十卷

宋本 滬市

每半葉十五行行二十五字前集後集續集凌駟撰

別集黃履翁撰

揮麈前錄四卷

宋本 上海瞿氏

王明清仲言撰其序在第四卷末結云淳熙乙巳中
元日朝請大夫主管台州崇道觀汝陰王明清書題

曰王知府自跋跋前爲季堂復仲言書題曰季賢良
簡又前爲臨汝郭九德跋又前爲沙隨程迥跋又前
爲仲言乾道丙戌冬長至成書自識三行紙墨頗佳
每半葉十一行行二十字每條第二行後皆低一字
首有汪士鐘印三十五峯園主人秋浦憲奎四印末
有平陽汪氏藏書印一印

續博物志

上海瞿氏

結銜云前都官員外郎隴西李石撰其中于本朝祖
宗等俱提行蓋猶宋式特非初印耳半葉十一行行
二十三字惜紙朽已裱裝過

纂圖附釋文重言互注老子道德經二卷

嘉興唐氏藏

十三行行二十三字巾箱本

梁江文通文集十卷目錄一卷

宋本

梁江淹撰第一二卷賦三四卷詩五卷傳書奏記牋表六卷爲始安王建平王章表教啟行狀七卷勅爲朝賢作書及尚書符慰勞雍州文爲蕭驃騎諸表啟教八九卷爲蕭太尉太傅齊公齊王表啟章自受禪後諸詔第十卷誄誌祭咒諸文及頌讚雜言騷辭終以自序一篇有云未嘗著書唯集十卷豈卽所自定耶其編次極有條理 四庫著錄本四卷特據明人

鈔集者猶未見此本也前後無序跋不知何時所刊
卷中鏡敬等字缺筆亦姑謂之宋本每半葉十行行
十八字卷目及五卷有印曰虛堂丙寅六月上海市
出者又見一陸士衡集與此本行字數與板式大小
皆相似惟宋諱字不缺筆乃明正德己卯六月都太
僕穆以宋慶元中華亭縣齋刊本與吳士陸元大重
刊者知文通此集卽是宋刊意宋時必有魏晉六朝
名集彙刻之本故兩集式攙若一耳

韓昌黎集五十一卷

宋世綵堂本

相傳明東雅堂徐氏翻刻廖氏世綵堂韓文一仍舊

式而不著其所從來今觀此本信然每葉中縫下截
悉有世綵堂字徐氏悉以東雅字易之傳目後有世
綵廖氏刻梓家塾篆字木印徐氏各卷尾亦仿之此
初印本紙墨精好字體在歐褚間徐本猶未能畢肖
也卷中有汪士鐘印閻源眞賞少谿主人項氏萬卷
堂圖藉印田耕堂藏泰峯審定郁松年印七印
古靈先生文集二十五卷使遼語錄一卷

宋本
唐氏藏
嘉興

末有其孫輝跋云四世從祖密學公平日所爲文章
不知其幾厥後哀掇爲卷者僅二十有五目曰古靈
先生文集以聖天子詔冠之預有榮焉里人大夫徐

君世昌嘗摹刊于家其間頗有舛譌歷歲既久且將
 漫漶輝竊有意于校正因仍未遑每以為恨揭來章
 貢屬數僚士參校亥豕因命仲子暕推次年譜併錄
 之木庶幾有以慰子孫瞻慕之心也紹興三十一年
 十月既望孫右朝請大夫直祕閣知贛州軍州主管
 學事兼管內勸農營田事提舉南安軍大雄州兵甲
 司公事江南西點兵馬鈐轄輝謹題大字十行行十

八字元印缺筆至拙則後所刊

山谷外集宋淳祐閩憲本

史薈室注山谷外集十七卷宋淳祐閩憲刊本半葉

九行行大小字均十九烏程蔣氏瑞松堂所藏同治
丙寅秋在滬假讀于海珊遂畱行篋中戊辰暮春來
吳門書局始取校嘉靖刊全集本資是正不少其中
閒先後脫五葉皆已鈔補按之非史氏元文乃昔藏
者意綴依謝蘊山刊翁覃谿校三注本別鈔易之翁
本第五卷和子瞻粲字韻詩闕注者數行此本此數
行適空木未刊知翁本即從此本出也

指南錄五卷

宋景炎本

嘉興唐氏藏

宋文天祥撰自序題是年夏午改元景炎廬陵□□
□自序其詩名曰指南當書名處皆剜空則元時所

爲也巾箱大字本八行行十六字第二卷有數題皆
墨釘蓋有所避

文苑英華纂要四卷

宋本

宋高似孫纂甲卷九十八葉乙卷九十七葉丙卷八
十二葉丁卷七十葉前有似孫序後有元趙文序上
海市出板稍漫漶蓋元明間印者每卷首有印曰宋
本曰元勛又曰汪厚齋藏書民部尚書郎汪士鐘印
蓋汪閬源舊藏每半葉十行行十七字其鈔撮不分
類但按卷次摘句摘段錄之

此書藏書志有之謂是元刻天祿琳琅以爲周

益公
著

文苑英華□ 孝宗皇帝閱文苑英華周益公直玉

堂夜 宣對 上謂祕閣本太舛錯再三命精讎十

卷以進一日侍公酒公以無佳本爲言因白架中有

此書間嘗用諸集是正頗改定十之二三公驚喜曰

英華本世所無况集耶迺盡笈去復以讎整者畀予

研訂書奏 御不爲無分毫助也後以本傳之廬陵

手書寄來急讀一遍因取其可必用者僅爲帙四又

以奉公復荅曰書千卷鮮克展盡顧乃獵之精舉之

確耶不減小洪公史語也初予官越洪公方在郡日

日陪棣華堂書研頗及史語公曰不過觀書寓筆示

不苟於觀耳予曰類書帙多字繁非惟不能盡記蓋亦未嘗盡見古人是以有撮取之功然迺切於自用非爲他人設也洪公擊節曰此正余意鈔亦出是歟治使史公來訪越墅因從容硯寮見鈔本曰鈞玄摘奇便於後學者也書成索甚力第二書報已稟第三書寄稟本令作鈔序迺誦益公洪公語以謝好雅嘉定十六年三月七日高似孫續古識

文苑英華後序

予少讀文苑英華困於浩瀚不能

盡究後得鄉先生高公手鈔文苑纂要四集計八十四卷復又撰十卷辨證考異凡古今名賢諸作有一

聯一句至奇至妙者必博采無遺予讀之神馳心醉
奇哉是書也世道不古讀書之道廢挾兔園冊者非
惟莫之見恐莫之間文運天開車書混同 聖天子
下詔求經明行修之士試六經古賦詔誥章表以觀
其所學試時務策以觀其所能士之懷才抱器者莫
不爲之鳶飛魚躍崇儒重道之風古之菁莪不是過
矣習科目者孰精於此書麀戰文場寸晷之下能使
朱衣人暗點頭則題雁塔縮銅章特拾芥耳文苑一
書當必遇賞音余老不能文姑述其略以贅高先生
手鈔之後云延祐甲寅冬後一日青山趙彤序

此序
係摹

寫草書
補者

萬寶詩山三十八卷

宋巾箱本

每卷題首云選編省監新奇萬寶詩山卷之幾書林
葉氏廣勤堂新槧悉取宋代省監所試五言六韻詩
分類編錄如今坊間寶珍試律大觀之比每卷約五
十葉葉三十行行二十三字三行一詩約四百六七
十首合三十八卷計之約詩萬六千餘首宋人帖體
亦收羅殆盡矣其板度五寸計高三寸半細行密字
寫刻亦精惜不載作者姓名遂無資于攷核徒成苑
園冊子而已首唯有田耕堂臧一印知藏書家所不

尚然四庫未著錄不能不以為祕函也

萬寶詩山敘 天下之寶多矣夫有天下者以道德
為寶有國家者以政事為寶文學之士所寶經書豪
富之家所寶珠玉仁親以為寶惟善以為寶不貪以
為寶此仁人賢士之寶也若夫吟詠風月繪畫煙雲
摘章摘句以詩賦為寶此亦皆本夫性情之正而達
于政事之體也蓋詩自虞廷賡歌以至周召雅頌之
什皆古聖賢制作以淑人心而垂教法雖閭巷俚俗
之謠聖人亦有取焉三百篇以降作者非一宋以詞
賦科取士故有省監之詩而文人才子業于是者未

免淘金揀玉以用其心詞語之華篇章之粹眞希世之寶也書林三峯葉景達氏掇拾類聚繡梓以傳于世目之曰萬寶詩山俾後學者有所矜式其用心亦弘矣梓成攜以示余因屬余敘余惟夫子有言曰小子何莫學夫詩詩可以興可以觀至於事父事君多識鳥獸草木之名則士君子誠意正心之要進德修業之方與夫薦郊廟格神人以鳴國家之盛者皆由詩而致務學之士其可忽諸余不敏特以此敘其概云□□□□雍作噩歲重九日蒲陽余性初序

宋元舊本書經眼錄卷一終

遵義趙崧篠蓉校字